

MENJAGA PANDANGAN DALAM SURAH AL-NUR MENURUT PENDAPAT SAYYID QUTB

Wan Ramizah binti Hasan
Dr. Mohd Farid Ravi bin Abdullah
Kolej Universiti Islam Antarabangsa Selangor
wanramizah@kuis.edu.my
faridravi@kuis.edu.my
Prof. Madya Dr. Adnan bin Mohamed Yusoff
Universiti Sains Islam Malaysia
adnan@usim.edu.my

Abstrak

Tafsiran tentang menjaga pandangan dalam surah al-Nur kurang diperbincangkan secara *mawdu'i* dalam kitab-kitab tafsir. Walau bagaimanapun kajian pensejarahan mendapati kitab tafsir yang berbentuk pentafsiran berasaskan objektif surah karangan Sayyid Qutb iaitu *Fī Zilāl al-Qur'ān* adalah yang terbaik. Justeru, penulisan ini dilakukan bertujuan mengkaji apakah pendapat dan pandangan Sayyid Qutb tentang menjaga pandangan yang terdapat dalam surah al-Nur, ayat 30-31. Metod yang digunakan dalam penulisan ini ialah analisis kandungan terhadap kitab-kitab tafsir dan hadis serta kajian-kajian ilmiah seperti tesis, jurnal-jurnal dan kertas-kertas penyelidikan. Kajian mendapati bahawa Sayyid Qutb telah membuat kupasan yang terperinci tentang menjaga pandangan. Beliau telah mengaitkan kepentingan menjaga pandangan dengan suasana masyarakat yang bersih dengan mendedahkan teori Freud yang tidak mendatangkan sebarang manfaat malah boleh merosakkan masyarakat. Beliau juga menjelaskan beberapa hukum yang berkaitan dengannya. Penulisan ini penting kerana kitab tafsir *Fī Zilāl al-Qur'ān* ini telah dapat menghuraikan dengan baik perkara-perkara yang berkaitan dengan masalah menjaga pandangan sekaligus membuktikan penguasaan Sayyid Qutb dalam berbagai ilmu yang dapat membantu mentafsirkan al-Quran al-Karim.

Kata kunci: Menjaga pandangan, surah al-Nur, Sayyid Qutb, *Fī Zilāl al-Qur'ān*

1.0. Pendahuluan

Penglihatan adalah nikmat Allah s.w.t yang sepatutnya wajib disyukuri oleh hamba-hambanya. Allah s.w.t berfirman dalam surah al-Nahl ayat 78:

وَاللَّهُ أَخْرَجَكُمْ مِنْ بُطُونِ أُمَّهَاتِكُمْ لَا تَعْلَمُونَ شَيْئًا وَجَعَلَ لَكُمُ السَّمْعَ
وَالْأَبْصَرَ وَالْأَفْئِدَةَ لَعَلَّكُمْ تَشْكُرُونَ ﴿٧٨﴾

Yang bermaksud:

Dan Allah mengeluarkan kamu dari perut ibu kamu dengan keadaan tidak mengetahui sesuatupun; dan Dia mengurniakan kepada kamu pendengaran dan penglihatan serta hati akal fikiran); supaya kamu bersyukur.

Oleh kerana itu, Allah s.w.t. memerintahkan orang-orang yang beriman, lelaki dan perempuan untuk menundukkan pandangannya dan menjaga kemaluannya dalam surah al-Nur ayat 30-31 sebagai salah satu tanda mensyukuri nikmat-Nya:

قُلْ لِلْمُؤْمِنِينَ يَغُضُّوا مِنْ أَبْصَارِهِمْ وَيَحْفَظُوا فُرُوجَهُمْ ذَلِكَ أَزْكَى لَهُمْ إِنَّ اللَّهَ خَبِيرٌ
بِمَا يَصْنَعُونَ ﴿٣٠﴾ وَقُلْ لِلْمُؤْمِنَاتِ يَغْضُضْنَ مِنْ أَبْصَارِهِنَّ وَيَحْفَظْنَ فُرُوجَهُنَّ وَلَا
يُبْدِينَ زِينَتَهُنَّ إِلَّا مَا ظَهَرَ مِنْهَا وَلْيَضْرِبْنَ بِخُمُرِهِنَّ عَلَى جُيُوبِهِنَّ وَلَا يُبْدِينَ
زِينَتَهُنَّ إِلَّا لِبُعُولَتِهِنَّ أَوْ آبَائِهِنَّ أَوْ آبَاءِ بُعُولَتِهِنَّ أَوْ أَبْنَائِهِنَّ أَوْ أَبْنَاءِ بُعُولَتِهِنَّ أَوْ
إِخْوَانِهِنَّ أَوْ بَنِي إِخْوَانِهِنَّ أَوْ بَنِي أَخَوَاتِهِنَّ أَوْ نِسَائِهِنَّ أَوْ مَا مَلَكَتْ أَيْمَانُهُنَّ أَوْ
التَّابِعِينَ غَيْرِ أُولِي الْإِرْبَةِ مِنَ الرِّجَالِ أَوِ الطِّفْلِ الَّذِينَ لَمْ يَظْهَرُوا عَلَى عَوْرَاتِ
النِّسَاءِ وَلَا يَضْرِبْنَ بِأَرْجُلِهِنَّ لِيُعْلَمَ مَا يُخْفِينَ مِنْ زِينَتِهِنَّ وَتُوبُوا إِلَى اللَّهِ جَمِيعًا
أَيُّهُ الْمُؤْمِنُونَ لَعَلَّكُمْ تُفْلِحُونَ ﴿٣١﴾

30. Katakanlah (Wahai Muhammad) kepada orang-orang lelaki yang beriman supaya mereka menyekat pandangan mereka (daripada memandang yang haram), dan memelihara kehormatan mereka. Yang demikian itu lebih suci bagi mereka; Sesungguhnya Allah amat mendalam pengetahuannya tentang apa yang mereka kerjakan. 31. Dan katakanlah kepada perempuan-perempuan yang beriman supaya menyekat pandangan mereka (daripada memandang yang haram), dan memelihara kehormatan mereka; dan janganlah mereka memperlihatkan perhiasan tubuh mereka kecuali yang zahir daripadanya; dan hendaklah mereka menutup belahan leher bajunya dengan tudung kepala mereka; dan janganlah mereka memperlihatkan perhiasan tubuh mereka melainkan kepada suami mereka, atau bapa mereka atau bapa mertua mereka atau anak-anak mereka, atau anak-anak tiri mereka, atau saudara-saudara mereka, atau anak bagi saudara-saudara mereka yang lelaki, atau anak bagi saudara-saudara mereka yang perempuan, atau perempuan-perempuan Islam, atau hamba-hamba mereka, atau orang gaji dari orang-orang lelaki yang telah tua dan tidak berkeinginan kepada perempuan, atau kanak-kanak yang belum mengerti lagi tentang aurat perempuan; dan janganlah mereka menghentakkan kaki untuk diketahui orang akan apa yang tersembunyi dari perhiasan mereka; dan bertaubatlah kamu sekalian kepada Allah, Wahai orang-orang yang beriman, supaya kamu berjaya.

Al-Imam Ibnu Kathir r.a. (2000) mengatakan bahawa ayat ini adalah perintah Allah s.w.t. kepada hamba-hamba-Nya yang beriman agar mereka menundukkan pandangan-pandangan mereka daripada apa yang diharamkan. Maka janganlah mereka memandang kecuali kepada apa yang diperbolehkan untuk dipandangnya. Dan agar mereka menjaga pandangannya dari perkara yang diharamkan. Ibnu al-Qayyim (2007) dalam kitabnya “Bahaya Zina”

menyatakan bahawa antara empat pintu masuk maksiat menuju manusia *al-Lahazat* iaitu pandangan mata.

Walau bagaimanapun huraian tentang menjaga pandangan secara *mawdui* dan terperinci dalam kitab-kitab tafsir tidak banyak diperbincangkan. Namun begitu, kajian pensejarahan mendapati *Fī Zilāl al-Qur'ān* karangan Sayyid Qutb adalah yang terbaik antara kitab-kitab tafsir yang membincangkan secara *mawdui* dan berbentuk pentafsiran berasaskan objektif surah. (Dr. Zulkifli Yusof, 2003)

Justeru, penulisan ini dilakukan bertujuan mengkaji apakah pandangan Sayyid Qutb tentang menjaga pandangan yang terdapat dalam surah al-Nur, ayat 30-31. Kajian atau penyelidikan ini adalah berbentuk perpustakaan atau *arm chair research*. Ia berasaskan kepada kaedah *maktabi* (perpustakaan) dimana pencarian maklumat dan data lebih tertumpu kepada bahan-bahan bercetak terutamanya kitab-kitab dan teks klasik.

Dalam pengkategorian yang lebih spesifik, kajian ini juga dapat dikelaskan sebagai *content analysis*. Analisis kandungan adalah salah satu kajian analisis terhadap istilah-istilah, teks-teks, frasa-frasa, konsep-konsep dan seumpamanya yang terkandung dalam bahan-bahan bercetak seperti buku, kitab, jurnal, akhbar, laporan bertulis dan seumpamanya dan ataupun bahan elektronik seperti rancangan televisyen, radio, cakera padat dan seumpamanya. (Ole R. Holsti (1969), Robert Philip Weber (1990))

1.1 Biografi Ringkas Sayyid Qutb dan Kitab Fi Zilal al-Quran

Nama lengkap beliau ialah Sayyid bin Haji Qutb bin Ibrahim Hussain Syazali, dilahirkan pada 9 Oktober 1906 M di kampung Musya atau *Musyat* salah satu kampung di daerah Asyut, Mesir. (Azmi Mohd Ali 1986) Keluarga beliau berasal dari keturunan India, iaitu sebelah datuknya. Ini diakui sendiri oleh Sayyid semasa al-Sayyid Abu al-Hasan Ali al-Husni al-Nadwi melawat Mesir pada tahun 1951 dan menyatakan bahawa beliau amat teringin untuk menziarahi negara India. Antara faktor utama adalah kerana datuknya yang keenam adalah seorang berbangsa India iaitu "al-Faqir Abd Allah".(Salah al-Khalidy 2000)

Dalam beberapa literatur biografi tokoh-tokoh Islam. Sayyid Qutb adalah salah seorang yang aktif berjuang dengan tulisan. Karya-karyanya selain beredar di negara-negara Islam, juga beredar di kawasan Eropah, Afrika, Asia dan Amerika. Ia menulis lebih dari 20 buku yang diterjemahkan dalam berbagai bahasa di dunia. Di antara bukunya adalah Tafsir *Fī Zilāl al-Qur'ān*. (Sri Aliyah 2013)

Sayyid Qutb juga dilihat mempunyai kepakaran dalam bidang satera. Oleh kerana itu, tulisannya dalam kitab *Fī Zilāl al-Qur'ān* adalah berbentuk *adabi*, *ijtima'i* dan *haraki*. Tafsir ini juga merupakan sebuah tafsir yang bersandarkan kepada unsur-unsur *naqliyyah* atau riwayat-riwayat yang *ma'thur*. Oleh yang demikian, pengarangnya menjauhi perbahasan-perbahasan ilmu bahasa dan tatabahasa, perbahasan ilmu kalam, ilmu fiqh dan tidak memasukkan cerita-cerita israiliyyat dan menjauhi penemuan-penemuan sains yang asasnya sentiasa berubah-ubah. (Sayyid Qutb, 2000)

1.2 Pandangan dan Pendapat Sayyid Qutb Tentang Menjaga Pandangan

Kajian terhadap kitab Tafsir *Fī Zilāl al-Qur'ān* mendapati perbincangan tentang ayat 30-31 dalam surah al-Nur yang diutarakan telah dibincang dengan terperinci. Beberapa pendekatan dan pandangan Sayyid Qutb dikupas dengan uslub yang menarik dan mudah difahami, antaranya adalah:

1.2.1 Menggariskan bahawa Menjaga Pandangan Adalah Langkah Pencegahan Daripada Perlakuan Zina

Sayyid Qutb ketika menulis dalam mukadimah sebelum menghuraikan tafsir surah al-Nur ayat 27-29 telah menjelaskan bahawa Islam tidak hanya bergantung kepada hukuman-hukuman hudud dalam usaha untuk mewujudkan masyarakat yang bersih, malah sebelum sesuatu yang lain ia bergantung kepada usaha-usaha pencegahan dan salah satunya adalah dengan menjaga atau menundukkan pandangan.

Pusingan yang kedua membicarakan saranan-saranan mencegah jenayah zina dan menjauhkan diri dari sebab-sebab yang menimbulkan godaan-godaan keberahian nafsu. Mula-mula diterangkan peradaban-peradaban rumahtangga dan peradaban meminta keizinan penghuninya (sebelum memasuki sesebuah rumah) serta menyuruh supaya menahankan diri (dari memandang pandangan yang diharamkan) dan melarang kaum perempuan dari menonjol-nonjolkan perhiasan melainkan kepada mahram, juga menggalakkan supaya mengahwinkan orang-orang yang masih bujang dan memberi amaran supaya jangan menolak gadis-gadis ke dalam lembah pelacuran. Semuanya ini merupakan saranan-saranan pencegahan dan pemeliharaan untuk menjamin kebersihan dan kesucian diri di alam hati nurani dan perasaan, juga untuk menolakan pengaruh-pengaruh yang merangsangkan keinginan-keinginan haiwaniah yang menekankan saraf orang-orang yang baik dan suci hati ketika mereka menentang pengaruh-pengaruh yang menggoda dan menimbulkan keberahian nafsu.

Sayyid Qutb telah menggariskan empat cara utama untuk mengelakkan diri daripada terjebak ke lembah zina iaitu wasilah yang pertama adalah meminta izin untuk masuk rumah. Wasilah kedua adalah menundukkan pandangan. Manakala wasilah ketiga adalah memudahkan urusan perkahwinan dan wasilah keempat adalah haram memaksa hamba perempuan untuk berzina. (Muhammad Yusuf Abbas, 1987)

Larangan memasuki rumah dan bilik ibubapa juga mempunyai kaitan dengan menjaga pandangan kerana besar kemungkinan sekiranya anak-anak terlihat perkara yang tidak sepatutnya mereka lihat, dibimbangi mereka akan menyimpan segala memori yang mereka nampak dan akhirnya melakukan tingkah laku yang melampaui batas. Ini bertepatan dengan kajian Love T. et al. (2015) yang menyatakan bahawa apa yang dilihat melalui mata, akan disampaikan kepada otak dan diproses dan secara tidak langsung jika dilihat secara berterusan, ia akan diproses menjadi memori jangka panjang seterusnya memberi kesan yang kuat kepada emosi dan tingkah laku seseorang.

Kajian di Malaysia mendapati kebanyakan pelajar universiti, remaja dan kanak-kanak telah terdedah kepada aktiviti pornografi. Maka adalah tidak mustahil aktiviti seterusnya selepas menyaksikan pornografi adalah melakukan perkara yang dilarang oleh Allah s.w.t. seperti hubungan seks secara haram atau zina. Pornografi boleh membawa kepada ketagihan seksual yang buruk dan tidak normal. Hal ini adalah disebabkan penonton pornografi akan beraksi berdasarkan apa yang dilihat, berfantasi dan berakhir dengan keputusan atau hasil yang merosakkan seseorang. (Nor Azah Abd Aziz dan Che Zarrina Saari, 2011)

1.2.2 Menegaskan Bahawa Menjaga Pandangan Dapat Menutup Jalan Godaan Nafsu Manusia

Setelah menghuraikan ayat yang berkaitan dengan meminta izin (*isti'dzan*), Sayyid Qutb menyatakan bahawa al-Quran menutup jalan godaan nafsu berahi yang dirangsangkan oleh

mata yang melihat bahagian tubuh badan yang memberahikan atau dirangsangkan oleh gerakgeri-gerakgeri wanita yang menimbulkan nafsu keinginan

Setelah selesai menerangkan peradaban meminta izin untuk memasuki rumah-rumah kediaman orang lain iaitu satu peraturan pencegahan untuk membersihkan perasaan manusia dan menghindarkannya dari sebab-sebab sepintas lalu yang boleh menggoda nafsu mereka, maka al-Quran terus menutup jalan godaan nafsu berahi manusia supaya ia tidak terlepas bebas dari tali tambatannya, iaitu godaan nafsu berahi yang dirangsangkan oleh mata yang melihat bahagian tubuh badan yang memberahikan atau dirangsangkan oleh gerakgeri-gerakgeri wanita yang menimbulkan nafsu keinginan:

Abdullah Nasih Ulwan (2015) menyatakan bahawa antara sebab yang membawa kepada penyelewengan anak serta keruntuhan akhlak ialah seorang bapa yang membiarkan anak-anaknya menonton televisyen yang penuh dengan gambaran syahwat atau isi-isi yang berunsur lucah, pastinya anak-anak akan terdidik dengan sifat tidak berkeperibadian dan akan dibiasakan dengan sifat-sifat terbuka tanpa pegangan.

Firman Allah s.w.t. dalam surah Ghafir ayat 19:

يَعْلَمُ خَائِنَةَ الْأَعْيُنِ وَمَا تُخْفِي الصُّدُورُ ﴿١٩﴾

Allah mengetahui pengkhianatan (penyelewengan dan ketiadaan jujur) pandangan mata seseorang, serta mengetahui akan apa yang tersembunyi di dalam hati.

Oleh kerana itu, Sayyid Qutb menegaskan bahawa menahan mata dari memandang wanita dari pihak lelaki merupakan satu peradaban diri dan satu usaha untuk mengatasi keinginan melihat bahagian-bahagian yang jelita dari wajah dan tubuh badan wanita. Ia juga merupakan satu usaha menutup jendela pertama dari jendela-jendela nafsu berahi dan satu tindakan mencegah sampainya tikaman anak panah nafsu yang beracun.

1.2.3 Menjelaskan Dua Akibat Apabila Tidak Menjaga Pandangan

Pada pandangan Sayyid Qutb, antara akibat tidak menjaga pandangan ialah pemuasan nafsu secara liar tanpa terikat kepada sesuatu peraturan atau pengidapan penyakit-penyakit saraf dan kompleks-kompleks jiwa yang terjadi akibat menahan nafsu selepas ia dirangsangkan. Proses ini merupakan satu proses yang hampir sama dengan penyeksan jiwa.

Kajian Nor Azah Abd Aziz dan Che Zarrina Saari (2011) mendapati bahawa pornografi boleh membawa kepada ketagihan seksual yang buruk dan tidak normal. Hal ini adalah disebabkan penonton pornografi akan beraksi berdasarkan apa yang dilihat, berfantasi dan berakhir dengan keputusan atau hasil yang merosakkan seseorang.

1.2.4 Mendedahkan Pendapat dan Teori Freud Yang Merbahaya Tentang Pergaulan Lelaki Dan Perempuan

Sayyid Qutb mendedahkan dalam kitab tafsirnya ini tentang teori Freud yang mengatakan bahawa pandangan, percakapan dan percampuran yang bebas di antara lelaki dan perempuan, gurau senda yang meriah di antara muda dan mudi, melihat bahagian-bahagian badan yang sulit dan memberahikan itu memberi kesan positif kepada manusia, antaranya adalah:

- a. boleh merehatkan jiwa manusia

- b. boleh melepaskan keinginan-keinginan mereka yang terpenjara
- c. dapat memelihara mereka dari akibat penekanan dan pemendam terhadap nafsu berahi
- d. dapat menyelamatkan mereka dari kompleks-kompleks jiwa
- e. dapat meringankan mereka dari desakan keinginan seks dan tindakan liar yang tidak selamat untuk memuaskan hawa nafsu di sebaliknya.

Walau bagaimanapun Sayyid Qutb telah menyaksikannya sendiri bahawa semua pendapat dan teori ini tidak benar kerana semua kebebasan ini tidak membawa kepada menghaluskan keinginan seks dan menjinakkannya, malah ia membawa kepada kegilaan nafsu seks yang tak kunjung puas dan tenang, malah ia terus dahaga dan terburu-buru.

Saya telah melihat mereka mengidap berbagai-bagai penyakit dan kompleks jiwa yang selama ini difaham tidak akan berlaku melainkan apabila wujudnya penafian atau pengharaman, dan apabila wujudnya keinginan yang kuat untuk melihat perempuan atau jenis lawan yang terlindung. Saya melihat gejala ini begitu banyak dan melihat bagaimana ia melahirkan berbagai-bagai jenis kelakuan seks yang ganjil.

Islam telah menggariskan batas-batas pergaulan antara lelaki dan perempuan, Menurut Dr Anisah (1999), pada prinsipnya pergaulan di antara lelaki perempuan adalah dilarang. Namun dalam keadaan dan batas-batas tertentu seperti darurat, kemaslahatan, keperluan dan kebiasaan adat setempat ia dibolehkan dengan syarat yang terbabit mestilah menjaga batas-batas syarak, iaitu berpakaian menutup aurat, merendah pandangan dan bercakap dalam keadaan biasa dan normal yang tidak ada unsur fitnah.

1.2.5 Mengaitkan Hubungan antara Menjaga Pandangan dan Memelihara Anggota Kelamin

Sayyid Qutb telah menegaskan bahawa seseorang itu dapat memelihara anggota kelamin daripada melakukan zina adalah hasil yang tabi'i dari amalan menahan mata dari memandangi perkara yang haram. Oleh sebab itulah Allah s.w.t mengumpulkan perintah menahan mata dari memandangi yang haram dan perintah memelihara anggota kelamin dalam satu ayat sahaja kerana kedua-duanya mempunyai hubungan yang amat dekat.

Allah s.w.t. memerintahkan orang-orang yang beriman, lelaki dan perempuan untuk menundukkan pandangannya dan menjaga kemaluannya. Termasuk menjaga kemaluan adalah menjaganya dari: zina, homoseks, lesbian, dan agar tidak tersingkap serta terlihat manusia. (Lihat Adhwa' Al-Bayan, Al-Imam Asy-Syinqithi 6/126)

Ibnu Qayyim (2007) dalam kitabnya "Bahaya Zina" menyatakan bahawa Allah s.w.t. mendahulukan perintah menundukkan pandangan mata sebelum perintah menjaga kemaluan. Ini adalah kerana banyak musibah besar yang berasal daripada pandangan, seperti kobaran api yang besar berasal dari bunga api. Mulanya hanya khayalan, kemudian langkah nyata, kemudian tindak kejahatan besar (zina).

Kajian sains daripada Marilita (2014) juga memperakui bahawa mata mempunyai kaitan dengan otak dan tingkahlaku manusia. Beliau menjelaskan bahawa mata merupakan alat yang menyampaikan maklumat kepada otak melalui kod dan corak yang tersendiri. Tenaga cahaya yang masuk ke dalam mata manusia akan ditukarkan kepada rangkaian impuls elektrik (signal yang dihantar macam elektrik) yang juga merupakan bahasa yang dapat dibaca oleh otak.

Allah menyuruh mereka melaksanakan langkah pencegahan ini kerana Dia Maha Mengetahui struktur jiwa manusia dan kejadian semulajadinya dan Maha Mengerti dengan gerak-geri hati dan harakat tubuh badan mereka:

إِنَّ اللَّهَ خَيْرٌ بِمَا يَصْنَعُونَ ﴿٣٠﴾

“Sesungguhnya Allah amat mengetahui segala apa yang dilakukan kamu” (30)

1.2.6 Menghuraikan Kesan Menjaga Pandangan

Sayyid Qutb juga menghuraikan kesan-kesan daripada menjaga pandangan daripada melihat perkara-perkara yang dilarang adalah

- a) Ia lebih bersih kepada perasaan-perasaan manusia.
- b) Lebih selamat kerana ia tidak tercemar dengan nafsu berahi pada bukan tempatnya yang halal dan bersih,
- c) Ia tidak terjerumus jatuh ke taraf haiwan yang rendah,
- d) Ia lebih mendatangkan kebersihan kepada masyarakat Muslimin dan
- e) Lebih memelihara kehormatan dan maruahnyanya, juga
- f) Memelihara kebersihan suasana hidup, di mana mereka hidup dan bernafas

Tulisan Sayyid Qutb ini menepati beberapa pandangan Ibnu al-Qayyim (2011) yang menyatakan bahawa menundukkan pandangan memiliki beberapa manfaat, antaranya:

- a) Selamatnya hati dari penyakit menyesal. Barang siapa yang mengumbar pandangan, maka penyesalannya semakin lama.
- b) Mewariskan cahaya dan kemuliaan di dalam hati, yang terpancarkan pada matanya, wajahnya dan anggota badannya.
- c) Melahirkan firasat ketajaman hati yang benar, kerana itu sebahagian dari cahaya dan buahnya.
- d) Melahirkan kekuatan hati, keteguhan dan keberanian jiwa.
- e) Membuka baginya jalan-jalan ilmu agama dan pintu-pintunya dan memudahkannya untuk meraih pintu-pintu tersebut.
- f) Menyelamatkan hati dari tawanan hawa nafsu dan syahwat, kerana tawanan yang sebenarnya adalah tawanan syahwat.
- g) Menyelamatkan hati dari mabuk syahwat dan buaian kelalaian. Sebahagian ulama salaf mengatakan: *Sesungguhnya orang yang menentang hawa nafsunya, maka dia telah memisahkan diri dari bayangan syaitan.*”

1.2.7 Menjelaskan Sebahagian Hukum-hukum Memperlihatkan Perhiasan Wanita

Sayyid Qutb amat memahami keinginan wanita yang mana setiap perempuan ingin menjadi cantik dan dipandang cantik. Walaupun perhiasan itu berbeza-beza dari satu zaman ke satu zaman, namun asas perhiasan itu adalah sama sahaja dalam fitrah perempuan, iaitu ingin mendapat dan menyempurnakan sifat-sifat kejelitaan dan menunjukkannya kepada kaum lelaki.

Kajian Rashidah Othman et.al. (2016) juga menyatakan bahawa fesyen menurut perspektif Islam adalah yang terbaik bagi wanita. Pensyariatannya sesuai dengan fitrah semula jadi wanita. Islam membenarkan wanita berfesyen, malah menyediakan panduan yang terbaik dapat memberi jaminan pada kesihatan fizikal dan spiritual wanita. Oleh itu, wanita perlu bijak dalam menganalisis dan mentafsir sebelum mengaplikasikan etika pemakaian Islam yang betul agar tidak melanggar fitrah manusia dan syariah Islamiyyah.

Sayyid Qutb menegaskan bahawa Islam tidak menentang keinginan semulajadi untuk memandang atau dipandang cantik dan menarik tetapi Islam mahu mengatur dan mengawalinya. Islam mahu menjadikan keinginan semulajadi itu menuju ke arah yang terang, iaitu ke arah suaminya yang tunggal selaku kongsi hidupnya, yang dapat memandang bahagian-bahagian badannya, yang tidak boleh dipandang oleh orang-orang yang lain darinya. Dan turut sama boleh memandang beberapa bahagian badannya ialah mahram-mahramnya yang disebut di dalam ayat selepas ini, yang terdiri dari orang-orang yang tidak timbul nafsu berahi mereka dengan pandangan itu. Oleh kerana itu, Allah s.w.t telah menyenaraikan nama-nama golongan yang boleh dilihat dan dipandang. Allah tidak mahu mendedahkan hati lelaki kepada ujian dan godaan dalam bala yang seperti ini.

1.2.8 Membandingkan Respon Suruhan Supaya Melabuhkan Tudung Antara Wanita Yang Beriman dan Tidak Beriman

Ayat 31 dalam surah al-Nur, secara khususnya Allah s.w.t telah menyarankan beberapa perkara kepada wanita dengan menambah tiga suruhan dan larangan

- a) Janganlah mereka melepaskan pandangan mereka yang lapar dan mencuri atau jelingan mata yang membisik dan membangkitkan nafsu berahi yang terpendam di dalam dada lelaki.
- b) Dan janganlah mereka menyerahkan anggota kelamin mereka melainkan dalam pernikahan yang halal, yang menyahut panggilan keinginan seks semulajadi dalam suasana yang bersih, di mana kanak-kanak yang lahir dari hubungan ini tidak merasa malu untuk menghadapi masyarakat dan kehidupan.
- c) Dan janganlah mereka memperlihatkan perhiasan (tubuh) mereka melainkan mana-mana bahagian yang ternampak darinya sahaja. Menurut Sayyid Qutb, perhiasan yang ternampak pada tangan dan muka, maka ia harus didedahkannya kerana mendedahkan muka dan dua tangan diharuskan. Ini berdasarkan sabda Rasulullah s.a.w. kepada Asma' binti Abu Bakr:

يا أسماء إن المرأة إذا بلغت المحيض, لم يصلح أن يرى منها إلا هذا - وأشار إلى وجهه وكفيه

“Wahai Asma’! Sesungguhnya seseorang perempuan itu apabila dia sampai usia datang haid tidak boleh dilihat bahagian badannya melainkan hanya bahagian ini sahaja.” – Lalu beliau memberi isyarat kepada muka dan dua tapak tangannya.

- d) Dan hendaklah mereka menutup belahan leher baju mereka dengan kain kelubung mereka iaitu kain penutup kepala, leher dan dada untuk melindungi bahagian-bahagian badan mereka yang menimbulkan nafsu berahi agar tidak terdedah kepada pandangan-pandangan mata yang lapar atau kepada pandangan mendadak atau terserempak, iaitu pandangan yang dijaga oleh orang-orang yang bertaqwa supaya tidak dipanjang atau diulangkan pandangan itu. Ini adalah kerana memandang wanita

kadang-kadang boleh meninggalkan perasaan berahi yang terpendam di dalam hati lelaki apabila mereka terpandang kepada bahagian-bahagian badannya yang menggiurkan sekiranya bahagian-bahagian itu didedahkan olehnya.

- e) Dan janganlah mereka menghentakkan kaki mereka (dengan tujuan) supaya diketahui orang perhiasan yang disembunyikan mereka dan al-Quran melarang perempuan-perempuan yang beriman dari memperlihatkan gerak-geri dan lenggang-lenggok yang menunjukkan adanya perhiasan-perhiasan yang tersembunyi, yang boleh membangkitkan keberahian yang terpendam dan nafsu yang tidur walaupun mereka tidak mendedahkan perhiasan itu

Sayyid Qutb telah menggambarkan wanita-wanita di zaman jahiliyah sama dengan wanita-wanita sekarang di zaman jahiliyah moden. Mereka lalu di tengah-tengah kaum lelaki dengan dada yang terdedah tanpa dilindungi seurat benang pun. Kadang-kadang mereka menampakkan leher, rambut dan subang-subang telinga mereka.

Walau bagaimanapun, wanita-wanita yang beriman akan segera menyahut seruan Allah s.w.t. ketika memerintah kaum wanita supaya menutup belahan leher baju mereka dengan kain kelubung dan melarang supaya jangan memperlihatkan perhiasan tubuh mereka melainkan bahagian yang ternampak sahaja, mereka terus mematuhiya sebagaimana telah diceritakan oleh 'Aisyah r.a. katanya: "Allah cururkan rahmat ke atas anggota perempuan-perempuan Muhajirin yang pertama, kerana sebaik sahaja turun ayat:

وَلْيَضْرِبْنَ بِخُمُرِهِنَّ عَلَىٰ جُيُوبِهِنَّ

"Dan hendaklah mereka menutup belahan leher baju mereka dengan kain kelubung mereka"(31)

mereka terus membelah kain lepas mereka untuk dijadikan kain kelubung lalu mereka berkelubung dengannya.

Beginilah juga Islam bertindak pada hari ini dalam barisan wanita-wanita yang beriman walaupun adirasa orang ramai terhadap kejelitaan itu telah menurun jatuh dan walaupun konsep kejelitaan itu telah dikongkangi oleh sifat kebinatangan, di mana mereka cenderung kepada mendedah dan membogelkan tubuh badan dan memuaskan nafsu seperti haiwan. Namun demikian wanita-wanita yang beriman tetap menutup bahagian-bahagian tubuh badan mereka yang menimbulkan nafsu lelaki dengan penuh kepatuhan dalam masyarakat yang mendedah dan menonjolkan hiasan badan yang menggiur, di mana wanita-wanita mengajak dan membisik kepada lelaki sebagaimana yang dilakukan oleh haiwan betina terhadap haiwan jantan.

1.2.9 Menjelaskan Golongan Yang Dikecualikan Dari Hukum Haram

Berpakaian yang sopan santun itu merupakan salah satu saranan pencegahan untuk melindungi individu dan masyarakat (dari godaan nafsu), oleh sebab itulah al-Quran mengharuskan wanita meninggalkan pakaian itu ketika aman dari fitnah nafsu, iaitu dengan mengecualikan mahram-mahram yang pada adatnya tidak menaruh nafsu keinginan terhadap mereka.

- a) Sayyid Qutb telah menjelaskan secara ringkas tentang golongan mahram seperti bapa-bapa, anak-anak, bapa-bapa suami dan anak-anak lelaki mereka, saudara-saudara lelaki dan anak-anak lelaki mereka, juga anak-anak lelaki saudara-saudara perempuan.

- b) Begitu juga al-Quran mengecualikan perempuan-perempuan yang beriman.

أَوْ نِسَائِهِنَّ أَوْ مَا مَلَكَتْ أَيْمَانُهُنَّ

“Atau perempuan-perempuan Islam sesama mereka”(31)

Walau bagaimana pun, Sayyid Qutb dengan tegasnya menyatakan bahawa perempuan-perempuan yang bukan Islam tidak dikecualikan kerana mereka mungkin menceritakan kepada suami-suami mereka, saudara-saudara lelaki mereka dan lelaki-lelaki yang seagama dengan mereka kecantikan-kecantikan dan aurat-aurat tubuh badan wanita-wanita Islam jika dilihat mereka. Tersebut di dalam hadith al-Bukhari dari Muslim:

لا تباشر المرأة المرأة تنعتها لزوجها كأنه يراها

“Janganlah perempuan menggauli perempuan yang lain kemudian menceritakan sifat-sifat perempuan itu kepada suaminya seolah-olah ia melihatnya.”

Adapun wanita-wanita Islam mereka dianggap amanah kerana kesedaran keagamaan yang ada pada mereka akan menghalang mereka dari menceritakan kepada suami-suami mereka sifat-sifat tubuh badan seseorang wanita Islam yang lain dan perhiasan-perhiasannya.

- c) Al-Quran juga mengecualikan hamba-hamba.

أَوْ مَا مَلَكَتْ أَيْمَانُهُنَّ

“Atau hamba-hamba yang dimiliki mereka”(31)

Sayyid Qutb juga membawa pendapat yang mengatakan hanya hamba-hamba perempuan sahaja, dan menurut satu pendapat yang lain pula termasuk hamba-hamba lelaki, kerana hamba lelaki tidak menaruh nafsu berahi terhadap tuannya yang perempuan. Namun begitu beliau lebih cenderung kepada pandangan yang pertama, kerana hamba lelaki juga manusia yang mempunyai nafsu berahi manusia walaupun ia mempunyai kedudukan khas dalam sesuatu masa yang tertentu.

- d) Al-Quran mengecualikan lagi:

أَوْ التَّالِبِينَ غَيْرِ أُولِي الْأَرْبَةِ مِنَ الرِّجَالِ

“Atau pembantu-pembantu rumah dari lelaki-lelaki yang tidak mempunyai keinginan”(31)

Mereka ialah lelaki-lelaki yang tidak menaruh keinginan terhadap perempuan kerana salah satu sebab dari sebab-sebab seperti mati pucuk, bodoh dan gila dan lain-lain sebab yang menahan lelaki dari mengingini perempuan, kerana fitrah nafsu keinginan tidak wujud di sini.

- e) Seterusnya al-Quran mengecualikan:

أَوْ الطِّفْلِ الَّذِينَ لَمْ يَظْهَرُوا عَلَى عَوْرَاتِ النِّسَاءِ

“Atau kanak-kanak yang belum mengerti tentang aurat-aurat perempuan”(31)

Iaitu kanak-kanak yang tidak menaruh nafsu berahi apabila melihat tubuh badan perempuan, tetapi apabila mereka meningkat kepada usia mumayyiz dan mempunyai nafsu berahi walaupun mereka belum baligh, maka kanak-kanak kumpulan ini tidak termasuk di bawah pengecualian.

Seluruh mereka – selain para suami – tidak ada apa-apa kesalahan kepada mereka dan kepada perempuan memandang tubuh badan perempuan kecuali bahagian-bahagian anggota di bawah pusat hingga ke bawah lutut kerana tidak wujud fitnah nafsu yang kerananya hal anggota-anggota itu wajib ditutupkan, tetapi bagi para suami ia boleh melihat seluruh badan isterinya tanpa kecuali.

1.2.10 Menjelaskan Hikmah Larangan Menghentakkan Kaki

Sayyid Qutb berpandangan bahawa al-Quran melarang perempuan-perempuan yang beriman dari memperlihatkan gerak-geri dan lenggang-lenggok yang menunjukkan adanya perhiasan-perhiasan yang tersembunyi, yang boleh membangkitkan nafsu syahwat yang terpendam dan nafsu yang tidur walaupun mereka tidak mendedahkan perhiasan itu adalah bertujuan untuk mencegah daripada berlakunya perkara yang keji.

وَلَا يَضْرِبْنَ بِأَرْجُلِهِنَّ لِيُعْلَمَ مَا يُخْفِينَ مِنْ زِينَتِهِنَّ

“Dan janganlah mereka menghentakkan kaki mereka (dengan tujuan) supaya diketahui orang perhiasan yang disembunyikan mereka.”(31)

Perintah ini membuktikan satu pengertian yang amat mendalam terhadap tabi'at jiwa manusia, emosi-emosinya, sambutan-sambutan atau reaksi-reaksinya, kerana daya khayalan manusia kadang-kadang lebih kuat merangsangkan nafsu berahi dari pandangan mata kasar.

Dalam tafsiran ayat ini juga, Sayyid Qutb mendedahkan ramai lelaki yang tergerak nafsu syahwat mereka dengan hanya melihat kasut perempuan atau bajunya atau perhiasannya dan nafsu mereka lebih kuat terangsang dengan melihat benda-benda itu dari melihat tubuh perempuan itu sendiri. Begitu juga ramai lelaki yang tergerak hawa nafsu mereka dengan hanya mengenangkan rupa perempuan itu di dalam khayalan mereka dan hawa nafsu mereka lebih kuat terangsang dengan kenangan itu dari melihat tubuh perempuan itu sendiri di hadapan mereka.

Kes-kes yang seperti ini memang terkenal di sisi pakar-pakar penyakit jiwa pada hari ini. Mendengar bunyi gemercang barang-barang perhiasan perempuan atau menghidu bau minyak wangi yang dipakai olehnya dari jauh kadang-kadang dapat menimbulkan nafsu berahi ramai lelaki. Ia mengacau saraf-saraf perasaan mereka dan menggoda mereka dengan keinginan seks yang kuat, yang tidak dapat ditolak mereka.

Oleh itu al-Quran menutup segala jalan nafsu ini, kerana yang menurunkan al-Quran ini ialah Allah yang mencipta dan mengetahui jiwa makhluk yang diciptakan-Nya dan Dia Maha Halus dan Maha Mendalam ilmu pengetahuan-Nya.

Kesimpulan

Kajian mendapati bahawa Sayyid Qutb telah membuat kupasan yang terperinci tentang menjaga pandangan. Beliau telah mengaitkan kepentingan menjaga pandangan dengan suasana masyarakat yang bersih dengan mendedahkan teori Freud yang tidak mendatangkan sebarang manfaat malah boleh merosakkan masyarakat. Beliau juga menjelaskan beberapa hukum yang berkaitan dengannya. Penulisan ini penting kerana kitab tafsir *Fī Zilāl al-Qur'ān* ini telah dapat menghuraikan dengan baik perkara-perkara yang berkaitan dengan masalah menjaga pandangan sekaligus membuktikan penguasaan Sayyid Qutb dalam berbagai ilmu yang dapat membantu mentafsirkan al-Quran al-Karim.

Rujukan

- Ahmad Mustafa al-Maraghiy, *Tafsir al-Maraghiy*, (2001) Terj. Muhammad Thalib, Dewan Bahasa dan Pustaka, Kuala Lumpur
- Anisah Ab Ghani, (1999) Batas-batas Pergaulan Antara Lelaki dan Perempuan Dalam Masyarakat Islam Kini: Satu Huraian Hukum Islam Semasa, *Jurnal Syariah* (Volume 7, No. 1, 1999, Pages 1 to 30).
- Azmi Mohd Ali (1986.), *Biografi Asy-Syahid Sayyid Qutb Rahimahullah*. Kuala Lumpur: Penerbitan Hizbi, h. 10
- Dr Abdullah Nasih Ulwan, (2015) *Tarbiyatul Aulad Fil Islam*, Terj. Publishing House, Selangor.
- Ibnu Qayyim al-Jauziyah, (2007), *Bahaya Zina*, Terj. Tim Darul Haq, Maktab Dakwah dan Bimbingan Jaliyat Rabwah, Jakarta.
- Marilita M Moschos, (2014) *Physiology and Psychology of Vision and Its Disorders: A Review* Department of Ophthalmology, University of Athens, Greece. Med Hypothesis Discov Innov Ophthalmol
- Muhammad Yusuf Abbas, (1987) *Miftāḥ Kunūz Fī Zilāl al-Qur'ān*, Dar Taybah, Riyadh.
- Nafisah Tahir, Kamal Ashaari, *Ajarkan Wanita Surah al-Nur*, 2016, Pustaka Zhilal, Kuala Lumpur
- Nor Azah Abd Aziz, Che Zarrina Saari, (2011), *Menangani Permasalahan Laman Web Pornografi: Antara Perisian Penapis, Penguatkuasa Undang-undang dan Amalan Spiritual*.
- Noriza binti Mohd Shaimi (2009) yang bertajuk “*Kaedah Pencegahan Perzinaan: Satu Kajian dalam Surah al-Nur*”.
- Ole R. Holsti (1969) *Content Analysis for the Sosial Sciences and Humanities*. California: Addison-Wesley Publishing Company
- Rashidah Othman, Siti Norlina Muhamad, Farahwahida Mohd Yusof, Muhammad Amir Wan Harun, *Fesyen Wanita Menurut Perspektif Islam dan Kesannya Terhadap Kesejahteraan Fizikal dan Spiritual*, (2016) UTM Press, Skudai.

Robert Philip Weber (1990), *Basic Content Analysis*. London : Sage Publications

Salah Abdul Fattah Al-Khalidiyy (2000), *Sayyid Qutb al-Adib al-Naqid wa al-Daiyah al-Mujahid wa al-Mufakkir al-Raid*. Damsyik: Dar al-Qalam,

Sayyid Qutb (2000), Tafsir Fi Zilal al-Qur'an "Di Bawah Bayangan al-Qur'an", (Terj) Yusoff Zaky Yacob, Kota Bharu: Pustaka Aman Press

Sayyid Qutb, (2010) *Tafsir Fi Zilalil Qur'an, Di Bawah Bayangan al-Quran*, Terj Dato' Yusoff Zaky Haji Yacob, Pustaka Darul Iman Sdn, Bhd. Cet 1

Todd Love, Christian Laier , Matthias Brand, Linda Hatch, Raju Hajela, (2015) *Neuroscience of Internet Pornography Addiction: A Review and Update*, ISSN 2076-328X
www.mdpi.com/journal/behavsci/

Zulkifli Haji Mohd Yusoff, (2003) *Tafsir al-Mawdui: Kajian Pensejarahan*, Jabatan al-Quran dan al-Hadith, Uni. Malaya,

www.lidwa.com